



張九齡集卷第三

七言古詩

奉和聖製瑞雪篇

萬年春三朝日上御明臺旅庭實初瑞雪今  
霏微俄同雲兮蒙密此時騷切陰風生先過  
金殿有餘清信宿嬋娟飛雪度能使玉人俱  
掩嫺皓皓樓前月初白紛紛陌上塵皆素昨  
訝驕陽積數旬始知和氣待迎新匪惟在人  
利曾是扶天意天意豈云遙雪下不崇朝皇

情翫無斃雪委方盈尺草樹紛早榮京坻宛  
先積君恩誠謂何歲稔復人和預數斯箱慶  
應如此雪多朝冕旒兮載悅想臺筮兮農節  
倚瑤琴兮或歌續薰風兮瑞雪福浸昌應尤  
盛瑞雪年年常感聖願以栢梁作長爲柳花  
詠

奉和聖製溫泉歌

有時神物待聖人去後湯還冷來時樹亦春  
今茲十月自東歸羽旆逶迤上翠微温谷葱

葱佳氣色離宮奕奕斗光輝臨渭川近天邑  
浴日温泉復在茲群仙洞府那相及吾君利  
物心玄澤浸蒼黔漸漬神湯無疾苦薰歌一  
曲感人深

五言律詩

奉和聖製經孔子舊宅

丘門太山下不見登封時徒有先王法今爲  
明主思恩加萬乘幸禮致一牢祠舊宅千年  
外光華空在茲

奉和聖製次瓊岳韻

山祇亦望幸雲雨見靈心岳館逢朝霽關門  
解宿陰咸京天上近清渭日邊臨我武因冬  
狩何言是即禽

奉和聖製送李尚書入蜀

眷言感忠義何有間山川狗節今如此離情  
空復然皇心在勤恤德澤委昭宣周月成功  
後明年或勞還

奉和聖製初出洛城

東土淹龍駕西人望翠華山川祇詢物宮觀  
豈爲家十月迴星斗千官捧日車洛陽無怨  
思巡幸更非賒

蘇侍郎紫微庭各賦一物得芍藥

仙禁生紅藥微芳不自持幸因清切地還遇  
艷陽時名見桐君錄香聞鄭國詩孤根若可  
用非直愛華滋

和崔黃門寓直夜聽蟬之作

蟬嘶玉樹枝向夕惠風吹幸入連宵聽應緣

飲露知思深秋欲近聲靜夜相宜不是黃金  
飾清香徒爾爲

和姚令公從幸温湯喜雪

萬乘飛黃馬千金狐白裘正逢銀霰積如向  
玉京遊瑞色鋪馳道花文拂綵旒還聞吉甫  
頌不共郢歌儔

和王司馬折梅寄京邑昆弟

離別念同嬉方榮欲共持獨攀南國樹遙寄  
北風時林暗迎春早花愁去日遲還聞折梅

處更有棣華詩

和黃門盧侍郎詠竹

清切紫庭垂歲蕤防露枝色無玄月變聲有  
惠風吹高節人相重身心世所知鳳凰佳可  
食一去一來儀

和韋尚書荅梓州兄南亭宴集

棠棣聞餘興烏衣有舊游門前杜城陌池上  
曲江流暇日嘗繁會清風詠阻修始知西峙  
嶽同氣此相求

荅陳拾遺贈竹簪

與君嘗此志因物復知心遺我鍾龍節非無  
玳瑁簪幽素宜相重雕華豈所任為君安首  
飾懷此代兼金

贈澧陽韋明府

君有百鍊刃堪斷七重犀誰開太阿匣持割  
武城鷄竟與尚書佩還應天子提何時遇操  
宰當使玉如泥

在洪州荅綦毋學士

旬雨不愆期由來自若時爾無言郡政吾豈  
欲天欺常念消塵益惟歡草樹滋課成非所  
擬人望在東菑

酬王六霽後書懷見示

雲雨俱行罷江天已洞開炎氛霽後滅邊緒  
望中來作驥君垂耳為魚我曝鰓更憐湘水  
賦還是洛陽才

酬王六寒朝見詒

賈生流寓日揚子寂寥時在物多相背唯君

獨見思漁為江上曲雪作郢中詞忽枉兼金  
訊長懷伐木詩

三月日三登龍山

伊川與霸津今日袂除人豈似龍山上還同  
湘水濱衰顏憂更老淑景望非春襍飲豈吾  
事聊將偶俗塵

晚霽登王六東閣

試上江樓望初逢山雨晴連空青嶂合向晚  
白雲生彼美要殊觀蕭條見遠晴情來不可

極日暮水流清

林亭詠

穿竹非求麗幽閒欲寄情偶懷因壤石真意  
在蓬瀛苔益山文古池添竹氣清從茲果蕭  
散無事亦無營

晨出郡舍林下

晨興步北林蕭散一開襟復見林上月娟娟  
猶未沉片雲自孤遠叢篠亦清深無事由來  
貴方知物外心

司馬崔頌和

優閑表政清林薄賞秋成江上懸曉月往來  
虧復盈天雲抗直意郡閣晦高名坐嘯應無  
欲寧辜濟物情

園中時蔬盡皆鋤理唯秋蘭數本委  
而不顧彼雖一物有足悲者遂賦二  
章

塲藿已成歲園葵亦向陽蘭時獨不偶露節  
漸無芳昔異菁為畜甘非蔗有漿人多利一

飽誰復惜馨香

幸得不鋤去孤苗守舊根無心羨昔蓄豈欲  
近名園遇賞寧充佩為生莫礙門幽林芳意  
在非是為人論

林亭寓言

林居逢歲晏遇物使情多蘅蒨不時與芬榮  
柰汝何更憐籬下菊無如松上蘿因依自有  
命非是隔陽和

再酬使風見示刺史裴耀卿



茲地五湖隣艱哉萬里人驚颺翻是託危浪  
亦相因宣室才華子金閨諷議臣承明有三  
入去去速歸輪

送使廣州

家在湘源住君今海嶠行經過中正道相送  
倍為情心逐書郵去形隨世網嬰因聲謝遠  
別緣義不緣名

送姚評事入蜀各賦一物得肆卜

蜀巖化已久沉真空所思所聞賣卜處猶憶

下簾時驅傳應經此懷賢儻問之歸來說往  
事歷歷偶心期

送竇校書見餞得雲中辨江樹

江水連天色天涯淨野氛微明岸傍樹凌亂  
渚前雲舉棹形隨轉登艫意漸分渺茫從此  
去空復惜離群

餞王司馬入計同用洲字

元寮行上計舉餞出林丘忽望題輿遠空思  
解榻遊別筵鋪柳岬征棹倚蘆洲獨嘆湘江

水朝宗向北流

東湖臨泛餞王司馬

南土秋雖半東湖草未黃聊乘風日好來泛  
芰荷香蘭棹每勞遠菱歌不厭長忽懷京洛  
去難與共清光

餞濟陰梁明府各探一物得荷葉

荷葉生幽渚芳華信在茲朝朝空此地采采  
欲因誰但恐星霜改還將蒲稗衰懷君美人  
別聊以贈心期

餞陳學還江南同用徵字

荷篠旋江澳銜杯餞霸陵別前林鳥息歸處  
海煙凝風土鄉情接雲山客念憑聖朝巖穴  
選應待鶴書徵

通化門外送別

屢別容華改長愁意緒微義將私愛隔情與  
故人歸薄宦無時賞勞生有事機離魂今夕  
夢先繞舊林飛

送楊道士往天台

鬼谷還成道天台去學仙行應松子化留與  
世人傳此地煙波遠何時羽駕旋當須一把  
袂城郭共依然

送楊府李功曹

平生屬良友結綬望光輝何知人事拙相與  
宦情非別路穿林盡征帆際海歸居然已多  
意况復兩鄉違

送宛句趙少府

解巾行作吏樽酒謝離居修竹含清景華池

澹碧虛地將幽興愜人與鷺遊疎林下紛相  
送多逢長者車

送韋城李少府

送客南昌尉離亭西候春野花看欲盡林鳥  
聽猶新別酒青門路歸軒白馬津相知無遠  
近萬里尚為鄰

送蘇主簿赴偃師

我與文雄別胡然邑吏歸賢人安下位鷺鳥  
欲卑飛激節輕華冕移官狗絲衣羨君行樂

者從此拜庭闈

送廣州周判官

海郡雄蠻落津亭壯越臺城隅百雉映水曲  
萬家開里樹枕榔出時禽翡翠來觀風猶未  
盡早晚使車迴

郡江南上別孫侍郎

雲嶂天涯盡川途海縣窮何言此地僻忽與  
故人同身負邦君弩情紆御史驄王程不我  
駐離思逐秋風

奉酬洪州江上見贈監察御史孫翊  
受命讞封疆逢君牧豫章於焉審虞芮復爾  
共舟舫悵別秋陰盡懷歸客思長江皋枉離  
贈持此慰他鄉

自豫章南還江上作

歸去南江水磷磷見底清轉逢空闊處聊洗  
滯留情浦樹遙如待江鷗近若迎津途別有  
趣况乃濯吾纓

道逢北使題贈京邑親知

征驂稍靡靡去國方遲遲  
路遶南登岸情搖北上旗  
故人憐別日旅鴈逐歸時  
歲晏無芳草將何寄所思

張九齡集卷第三

張九齡集卷第四

五言律詩

江上使風呈裴宣州

江路與天連風帆何淼然  
遙林浪出沒孤舫鳥聯翩  
常自千鈞重深思萬事捐  
報恩非狗祿還逐賈人船

溪行寄王震

山氣朝來爽谿流自尚清  
遠心何處愜閑棹此中行  
叢桂林間待群鷗水上迎  
徒然適我

願幽獨為誰情

將至岳陽有懷趙二

湘浦多深林青冥晝結陰獨無謝客賞况復  
賈生心草色雖云發天光或未臨江潭非所  
遇為爾白頭吟

使還湘水

歸舟宛何處正值楚江平夕逗煙村宿朝緣  
浦樹行于役已彌歲言旋今愜情鄉郊尚千  
里流目夏雲生

初發道中寄遠

日夜鄉山遠秋風復此時舊聞胡馬思今聽  
楚猿悲念別朝昏苦懷歸歲月遲壯圖空不  
息常恐髮如絲

自湘水南行

落日催行舫逶迤洲渚間誰云有物役乘此  
更休閒暝色生前浦清暉發近山中流澹容  
與唯愛鳥飛還

初入湘中有喜

征鞍窮郢路歸棹入湘流望鳥唯貪疾聞猿  
亦罷愁兩邊楓作岸數處橘爲洲却計從來  
憶翻疑夢裏遊

耒陽溪夜行

乘夕棹歸舟緣源路轉幽月明看嶺樹風靜  
聽溪流嵐氣船間入霜華衣上浮猿聲雖此  
夜不是別家愁

江上

長林何繚繞遠水復悠悠盡日餘無見爲心

那不愁憶將親愛別行爲主恩酬感激空如  
此芳時屢已適

自彭蠡初入江

江岫殊空闊雲煙處處浮上來群噪鳥中去  
獨行舟牢落誰相顧逶迤日自愁更將心問  
影于役復何求

赴使瀧峽

谿路日幽深寒空入兩欽霜清百丈水風落  
萬重林夕鳥聯歸翼秋猿斷去心別離多遠

思况乃歲方陰

湖口望廬山瀑布水

萬丈洪泉落迢迢半紫芬  
犇飛下雜樹灑落出重雲  
日照虹蜺似天清風雨聞  
靈山多秀色空水共氤氳

滇陽峽

行舟傍越岑窈窕越溪深水閤  
先秋冷山晴當晝陰重林間  
五色對壁聳千尋惜此生遐  
遠誰知造化心

使至廣州

昔年嘗不調茲地亦遭迴  
本謂雙鳧少何知駟馬來  
人非漢使橐郡是越王臺  
去去雖殊事山川長在哉

春江晚景

江林皆秀發雲日復相鮮  
征路那逢此春心益眇然  
興來祇自得住處莫能傳  
薄暮津亭下餘花滿客船

與王六履廣州津亭曉望



明發臨前渚寒來淨遠空水紋天上碧日氣  
海邊紅景物紛爲異人情賴此同乘桴自有  
適非欲破長風

初發曲江溪中

溪流清且深松石復陰臨正爾可嘉處胡爲  
無賞心我由不忍別物亦有緣侵自匪嘗行  
邁誰能知此音

旅宿淮陽亭口號

日暮荒亭上悠悠旅思多故鄉臨桂水今夜

眇星河暗草霜華發空亭鴈影過興來誰與  
晤勞者自爲歌

望月懷遠

海上生明月天涯共此時情人怨遙夜竟夕  
起相思滅燭憐光滿披衣覺露滋不堪盈手  
贈還寢夢佳期

秋夕望月

清迥江城月光流萬里同所思如夢裏相望  
在庭中皎潔青苔露蕭條黃葉風含情不得

語頻使桂華空

詠鷺

海鷺何微眇乘春亦蹇來豈知泥滓賤祇見  
玉堂開繡戶時雙入華軒日幾迴無心與物  
競鷹隼莫相猜

勅賜寧主池宴

賢王有池館明主賜春游淑氣林間發恩光  
水上浮徒叅和鼎地終謝巨川舟皇澤空如  
此輕生莫可酬

立春日晨起對積雪

忽對林亭雪瑤華處處開今年迎氣始昨夜  
伴春迴玉潤窓前竹花繁院裏梅東郊齋祭  
所應見五神來

天津橋東旬宴得歌字韻

清洛象天河東流形勝多朝來逢宴喜春盡  
却妍和泉鮪歡時躍林鷺醉後歌賜恩頻若  
此爲樂奈人何

上陽水窓旬得移字韻

河漢非應到汀洲忽在斯仍逢帝樂下如逐  
海槎窺春賞時將換皇恩歲不移今朝游宴  
所莫比天泉池

故刑部李尚書荆谷山集會

嘗聞繼老聃身退道彌耽結宇倚青壁疏泉  
噴碧潭苔石隨人古煙花寄酒酣山光紛向  
夕歸與杜城南

三月三日申王園亭宴集

稽亭追往事睢苑勝前聞飛閣凌芳樹華池

落綵雲藉草人留酌銜花鳥赴群向來同賞  
處惟恨碧林曛

戲題春意

一作江南守江林三四春相鳴不及鳥相樂  
喜關人日守朱絲直年催華髮新淮陽祇有  
卧持此度芳辰

庭梅詠

芳意何能早孤榮亦自危更憐花帶弱不受  
歲寒移朝雪那相妬陰風已屢吹馨香雖尚

爾飄蕩復誰知

折楊柳

纖纖折楊柳持此寄情人一枝何足貴憐是  
故園春遲景那能久流芳不及新更愁征戍  
客容鬢老邊塵

剪綵

姹女矜容色爲花不讓春旣爭芳意早誰待  
物華真葉作參差發枝從點綴新自然無限  
態長在艷陽人

聽箏

端居正無緒那復發秦箏纖指傳新意繁絃  
起怨情悠揚思欲絕掩抑態還生豈是聲能  
感人心自不平

初秋憶金均兩弟

江渚秋風至他鄉離別心孤雲愁自遠一葉  
感何深憂喜嘗同城飛鳴忽異林青山西北  
望堪作白頭吟

秋懷

感惜芳時換誰知客思懸憶隨鴻向暖愁學  
馬思邊留滯機還息紛拏網自牽東南起歸  
望何處是江天

故刑部李尚書挽詞三首

仙宗出趙北相業起山東明德嘗為禮嘉謀  
屢作忠論經白虎殿獻賦甘泉宮與善今何  
在蒼生望已空  
宿昔三台踐榮華駟馬歸印從青瑣拜翰入  
紫宸揮題劔恩方重藏舟事已非龍門不可

望感激涕沾衣

永歎常山寶沉埋京兆阡同盟會五月華表  
記千年渺漫野中草微茫空裏煙共悲人事  
絕唯對杜陵田

故徐州刺史贈吏部侍郎蘇公挽歌

詞三首

韋玄方繼相荀爽復齊名在貴兼天爵能賢  
出世卿學聞金馬詔神見玉人情藏壑今如  
此為山遂不成

相如只謝病子敬忽云云豈悟瑤臺雪分雕  
玉樹行清規留草議故事在封章本謂山公  
啓而今歿始揚

返葬長安陌秋風簫鼓悲柰何相送者不是  
平生時寒影催年急哀歌助晚遲寧知建旗  
罷丹旄向京師

故滎陽君蘇氏挽歌詞三首

門緒公侯列嬪風詩禮行松蘿方有寄桃李  
忽無成劍去雙龍別雛哀九鳳鳴何言嶧山

樹還似半心生

永嘆芳魂斷行看草露滋二宗榮盛日千古  
別離時竟罷生菊贈空留畫扇悲客車候曉  
發何歲是歸期  
縞服紛相送玄扃翳不開更悲泉火戚徒見  
柳車迴舊室容衣奠新塋拱樹栽唯應月照  
簞潘岳此時哀

眉州康司馬挽歌詞

家受專門學人稱入室賢劉禎徒有氣管輅

獨無年謫去長沙國魂歸京兆阡徒來匣中  
劍埋歿罷衝天

張九齡集卷第四

